

經籍典第三百四卷

孝經部紀事

漢書宣帝本紀昭帝元平元年秋七月光奏議曰禮人道親親故尊祖尊祖故敬宗大宗無祠擇支子孫賢者爲嗣孝武皇帝曾孫病已有詔掖庭養視至今年十八師受詩論語孝經操行節儉慈仁愛人可以嗣孝昭皇帝後奉承祖宗子萬姓奏可

廣川惠王傳廣川王去卽繆王齊太子也師受易論語孝經皆通

韓延壽傳延壽嘗出臨上車騎吏一人後至敕功曹議罰白還至府門門卒當車願有所言延壽止車問之卒曰孝經曰資於事父以事君而敬同故母取其愛而君取其敬兼之者父也今旦明府早駕久駐未出騎吏父來至府門不敢入騎吏聞之趨走出謁適會明府登車以敬父而見罰得母虧大化乎延壽舉手與中曰微子太守不自知過歸舍召見門卒卒本諸生聞延壽賢無因自達故代卒延壽遂待用之

匡衡傳成帝卽位衡上疏戒妃匹勸經學曰論語孝經聖人言行之要宜究其意

儒林王式傳博士江公世爲魯詩宗至江公著孝經說

後漢書光武十王傳沛獻王輔矜嚴有法度好經書善說京氏易孝經論語傳及圖讖作五經論時號之曰沛王通論

鄭元傳元所註周易尙書毛詩儀禮禮記論語孝經周禮凡百餘萬言注案謝承書載元所注與此略同不言註孝經唯此書獨有也

范升傳升字辨卿代郡人也少孤依外家居九歲通論語孝經

翟酺傳酺字子超著援神鉤命解詁十二篇注援神契鉤命決皆孝經緯篇名也

荀淑傳淑子爽對策陳便宜曰漢制使天下誦孝經注平帝時王莽作書八篇戒子孫令學官以教授吏能誦者比孝經音義云言用之得選舉之也

蓋勳傳勳爲漢陽長史隴右刺史左昌坐斷盜徵以扶風宋臬代之臬患多寇叛謂勳曰涼州寡於學術故屢致反暴今欲以多寫孝經令家家習之庶或使人知義勳諫曰昔太公封齊崔杼弑君伯禽侯魯慶父篡位此二國豈乏學者今不急靜難之術遽爲非常之事旣足結怨一州又當取笑朝

廷勳不知其可也梟不從遂奏之行果被詔書詰責坐以虛慢徵

儒林傳何休爲人質朴雅有心思精研六經世儒無及者以列卿子詔拜郎中非其好也辭病去不仕州郡進退以禮太傅陳蕃辟之與叅政事蕃敗休坐廢錮迺注訓孝經論語皆經緯典謨不與守文同說

獨行傳向栩字輔興張角作亂栩上便宜頗譏刺左右不欲國家興兵但遣人於河上北向讀孝經賊自當消滅中常侍張讓讒栩不欲命將出師疑與角爲內應殺之

謝承後漢書仇覽傳覽字季智一名香陳留考城人也有羊元者凶惡不孝其母詣覽告元覽呼元誚責與孝經一卷使誦讀之元深改悔至母前謝罪諺曰孤犢觸乳驕子冒母乞今自改遂成佳士玉海劉向典校經籍以十八章爲定鄭衆馬融並爲之注又有鄭氏注相傳或云鄭元

三國志魏鍾會傳註會時遭所生母喪會爲其母傳曰夫人性矜嚴明於教訓會雖童稚勤見規誨年四歲授孝經

蜀秦宓傳宓曰孔子發憤作春秋大乎居正復制孝經廣陳德行杜漸防萌預有所抑

古今圖書集成
吳張昭傳孫權嘗問衛尉嚴峻寧念小時所闇書不峻因誦孝經仲尼居昭曰嚴峻鄙生臣請爲陛下誦之乃誦君子之事上咸以昭爲知所誦

吳嚴峻傳峻少耽學與諸葛瑾步騭齊名著孝經傳傳於世

晉書皇甫謐傳咸寧初詔謐爲太子中庶子復徵爲議郎又召補著作郎並不應著論爲葬送之制平生之物皆無自隨唯齋孝經一卷示不忘孝道

孝友傳許孜字季義東海吳寧人也孝友恭讓敏而好學年二十師事豫章太守會稽孔冲受詩書禮易及孝經論語學竟還鄉里

儒林傳虞喜字仲寧注孝經行於世

隱逸傳郭瑀字元瑜敦煌人也少有超俗之操東遊張掖師事郭荷盡傳其業精通經義雅辨談論多才藝善文荷卒瑀以父生之師成之君爵之而五服之制師不服重蓋聖人謙也遂服斬衰廬墓三年禮畢隱於臨松薤谷鑿石窟而居服柏實以輕身作孝經錯緯弟子著錄千餘人 祈嘉字

孔賓少清貧年二十餘西至敦煌依學官誦書貧無衣食爲書生都養以自給遂博通經傳精究大

義西游海渚教授門生百餘人張重華徵爲儒林祭酒性和裕教授不倦依孝經作二九神經在朝卿士郡縣守令彭知正等受業獨拜牀下者二千餘人

宋書天竺迦毗黎國傳慧琳者秦縣人姪劉氏少出家住冶城寺有才章兼外內之學爲廬陵王義真所知嘗著均善論論行於世舊僧謂其貶黜釋氏欲加擯斥太祖見論賞之元嘉中遂叅權要朝廷大事皆與議焉賓客輻輳門車常有數十兩四方贈賂相係勢傾一時註孝經傳於世

玉海江左中興孝經論語共立鄭氏博士

松下偶談崔英年九歲在秦王苻堅宮內讀書堅殿上方臥諸生皆趨英獨緩步怪而問之英曰陛下如慈父非桀紂君何用畏乎又問卿讀何書曰孝經堅曰有何義曰在上不驕堅爲之起更問有何義曰自天子至於庶人章上愛下下敬上堅曰卿好待十七必用卿爲大夫英曰日月可重見陛下至尊不可再覩洪恩士或可用則用何在後期堅曰須待十七必召卿也及期拜諫議大夫

南齊書文惠太子傳永明三年於崇正殿講孝經少傅王儉以擿句令太僕周顒撰爲義疏太子臨國學親策試諸生儉諮太子曰孝經仲尼居曾子侍夫孝理弘深大賢方盡其致何故不授顏子而

古今圖書集成
寄曾生太子曰曾生雖德慙體二而色養盡禮去物尙近接引非隔弘宣規教義在於此儉曰接引非隔弘宣雖易去聖轉遠其事彌輕既云人能弘道將恐人輕道廢太子曰理既有在不容以人廢言而況中賢之才弘上聖之教寧有壅塞之嫌臨川王暎諂曰孝爲德本常是所疑德施萬善孝由天性自然之理豈因積習太子曰不因積習而至所以可爲德本暎曰率由斯至不俟明德大孝榮親衆德光備以此而言豈得爲本太子曰孝有深淺德有小大因其分而爲本何所稍疑太子以長年臨學亦前代未有也

王儉傳上使陸澄誦孝經自仲尼居而起儉曰澄所謂博而寡要臣請誦之乃誦君子之事上章上曰善張子布更覺非奇也

張融傳融字思光解褐出爲封溪令浮海至交州於海中作海賦建武四年卒遺令令人捉麈尾登屋復魂曰吾生平所善自當凌雲一笑左手執孝經老子右手執小品法華經

周顒傳顒字彥倫汎涉百家卒官時會王儉講孝經未畢舉曇濟自代學者榮之

文學傳祖冲之字文遠范陽薊人也少稽古有機思釋論語孝經

高逸傳沈麟士字雲禎元嘉末文帝令尙書僕射何尙之抄撰五經訪舉學士縣以麟士應選尙之謂子偃曰山藪故有奇士也少時麟士稱疾歸鄉更不與人物通隱居教授從學者數十百人注易經禮記春秋論語孝經喪服老子要略數十卷

南史顧歡傳歡字景怡有病邪者歡問曰家有何書答曰惟有孝經歡曰可取仲尼居置病人枕邊恭敬之自差也病者果愈

梁書鄱陽忠烈王恢傳幼聰敏年七歲能通孝經論語義發擿無所遺

王僧孺傳僧孺年五歲讀孝經問授者此書所載述曰論忠孝二事僧孺曰若爾常願讀之

朱异傳詔求異能之士五經博士明山賓表薦异高祖召見使說孝經周易義甚說之謂左右曰朱异實異後見明山賓謂曰卿所舉殊得其人仍召异直西省俄兼太學博士其年高祖自講孝經使异執讀

孝行傳庾黔婁少好學多講誦孝經未嘗失色於人褚修錢塘人也父仲都天監中歷官五經博士修少傳父業兼通孝經論語

儒林傳嚴植之精解喪服孝經論語

賀瑒子革少通三禮及長徧治孝經論語毛詩

孔叡

會稽三陰人少師事何引通五經尤明三禮孝經論語講說並數十徧生徒亦數百人

皇侃少

好學尤明孝經論語起家國子助教於學講說聽者數百人性至孝常日限誦孝經二十徧以擬觀世音經

文學傳何遜八歲能賦詩博學有思理更註論語孝經

伏挺幼敏悟七歲通孝經論語

玉海梁代安國及鄭氏二家並立國學安國之本亡於梁亂

陳書周弘正傳太建五年授尙書右僕射祭酒中正如故尋敕侍東宮講論語孝經所著孝經疏兩卷行於世

徐陵傳陵子份少有父風年九歲爲夢賦陵見之謂所親曰吾幼屬文亦不如此份性孝悌陵嘗遇疾甚篤份焚香泣涕跪誦孝經晝夜不息如此三日陵疾豁然而愈親戚皆謂份孝感所致

孝行傳謝貞幼聰敏有至性七歲母王氏授貞論語孝經讀訖便誦

儒林傳張譏年十四通孝經論語簡文在東宮出土林館發孝經題譏論議往復甚見嗟賞自是每

有講習必遣使召譏所撰孝經義八卷

馬樞六歲能誦孝經論語老子

王元規少好學從

吳興沈文阿受業十八通春秋左氏孝經論語喪服著孝經記義兩卷

文學傳岑之敬五歲讀孝經每燒香正坐親戚咸加歎異年十六策春秋左氏制旨孝經義擢爲高第御史奏曰皇朝多士例止明經若顏閔之流乃應高第梁武帝省其策曰何妨我復有顏閔邪因召入面試令之敬升講座敕中書舍人朱異執孝經唱士孝章武帝親自論難之敬剖釋縱橫應對如響左右莫不嗟服乃除童子奉車郎賞賜優厚

魏書文成五王傳河間王若年十六未封而薨以齊郡王子琛繼琛字曇寶以肅宗始學獻金字孝經

封懿傳軌長子偉伯字君良太尉清河王懌辟參軍事懌親爲孝經解詁命偉伯爲難例九條皆發起隱漏

外戚傳馮熙字晉昌長樂信都人文明太后之兄也年十二始就博士學問從師受孝經論語

儒林傳陳奇志在著述五經始注孝經論語頗傳於世爲縉紳所稱 孫惠蔚年十五粗通詩書

及經論語

徐遵明年十七隨鄉人毛靈和等詣山東求學至上黨乃師屯留王聰受毛詩尙

書禮記一年便辭聰詣燕趙師事張吾貴遵明伏膺數月請更從師遂與平原田猛略就范陽孫買德受業一年復欲去之乃詣平原唐遷納之居於蠶舍讀孝經論語毛詩尙書三禮不出門院凡經六年時彈箏吹笛以自娛慰 盧景裕注周易尙書孝經論語禮記老子其毛詩春秋左氏未訖北齊書王紘傳紘字師羅年十三見揚州刺史太原郭元貞元貞撫其背曰汝讀何書對曰誦孝經曰孝經云何曰在上不驕爲下不亂貞曰吾作刺史豈其驕乎紘曰公雖不驕君子防未萌亦願留意元貞稱善

徐之才傳之才幼而備發五歲誦孝經八歲略通義旨

儒林傳李鉉年二十三便自潛居討論是非撰定孝經論語毛詩三禮義疏

周書齊煬王憲傳子貴字乾福少聰敏涉獵經史尤便騎射始讀孝經便謂人曰讀此一經足爲立身之本

長孫澄傳魏文帝嘗與太祖及羣臣公宴從容言曰孝經一卷人行之本諸公宜各引要言澄應聲

曰夙夜匪懈以事一人座中有人次曰匡救其惡旣而出閣太祖深歎澄之言合機而譴其次答者文帝十三子傳宋獻公震字彌俄突幼而敏達年十歲誦孝經論語毛詩

斛斯徵傳徵幼聰穎五歲誦孝經周易識者異之

顏之儀傳之儀幼穎悟三歲能讀孝經及長博涉羣書

蕭大圖傳大圖梁簡文帝之子也幼而聰敏神情俊悟年四歲能誦三都賦及孝經論語

儒林傳樊深學雖博瞻訥於辭辯故不爲當時所稱撰孝經一卷 熊安生少好學勵精不倦撰

孝經義疏一卷行世 樂遜正光中聞碩儒徐遵明領徒趙魏乃就學孝經喪服論語詩書禮易

左氏春秋大義

蕭簪傳簪子歸所著孝經義記行於世

異域高昌傳文字亦同華夏兼用其書有毛詩論語孝經置學官弟子以相教授雖習讀之而皆爲其語

隋書韋師傳師少沉謹有至性初就學始讀孝經捨書而歎曰名教之極其在茲乎

宇文弼傳煬帝卽位轉禮部尙書所著辭賦二十餘萬言爲尙書孝經注行於時

明克讓傳父山賓梁侍中克讓少好儒雅善談論博涉書史所覽將萬卷著孝經義疏一部

于仲文傳仲文字次武建平公義之兄子父實周大左輔燕國公仲文少聰敏髫髻就學耽閱不倦其父異之曰此兒必興吾宗矣九歲嘗於雲陽宮見周太祖太祖問曰聞兒好讀書書有何事仲文對曰資父事君忠孝而已太祖甚嗟嘆之

儒林傳何妥性勁急有口才好是非人物時納言蘇威嘗言於上曰臣先人每誡臣云唯讀孝經一卷足可立身治國何用多爲上亦然之妥進曰蘇威所學非止孝經厥父若信有此言威不從訓是其不孝若無此言面欺陛下是其不誠不誠不孝何以事君且夫子有云不讀詩無以言不讀禮無以立豈容蘇綽教子獨反聖人之訓乎妥撰孝經義疏三卷

劉炫內史送詣吏部吏部尙書韋

世惠問其所能炫自爲狀曰周禮禮記毛詩尙書公羊左傳孝經論語孔鄭王何服杜等注凡十三家雖義有精粗並堪講授著孝經述議五卷行於世

張仲字叔元覃思經典撰孝經義三卷

文學傳王頰年二十尙不知書爲其兄顓所責怒於是感激始讀孝經論語晝夜不倦年二十二周

武帝引爲露門學士開皇五年令於國子講授會高祖親臨釋奠國子祭酒元善講孝經頗與相論難詞義鋒起善往往見屈高祖大奇之

玉海安國之本亡於梁亂至隋祕書監王劭於京師訪得孔傳送至河間劉炫炫因述其議疏講於人間後遂著令與鄭氏並立儒者皆云炫自作之非孔舊本

唐書中宗四子傳太子重俊性明果然少法度右庶子平貞慎獻孝經議太子納而不克用

楊瑒傳瑒從父兄宴精孝經學常手寫數十篇可教者輒遺之

邢文偉傳載初元年爲內史后御明堂詔文偉發孝經后問天與帝異稱云何文偉曰天帝一也制曰郊后稷以配天祀文王於明堂以配上帝奈何而一對曰先儒執論不同昊天及五方總六天帝后曰帝有六則天不同稱固矣文偉不能對

按載初即天授元年是年改元者再

獨孤及傳及字至之河南洛陽人爲兒時讀孝經父試之曰兒志何語對曰立身行道揚名於後世宗黨奇之天寶末以道舉高第

薛戎傳弟放端厚寡言穆宗卽位參贊機命帝嘗問朕欲學經與史何先放曰六經者聖人之言孔

子所發明天人之極也史記道成敗得失亦足以鑒然謬於是非非六經比帝曰吾聞學者白首不能通一經安得其要乎對曰論語六經之菁華也孝經人倫之本也漢時論語首立學官光武令虎賁士皆習孝經元宗爲注訓蓋知孝慈則氣感和樂也帝曰聖人以孝爲至德要道信然

于公異傳始公異與陸贄故有隙世多言公異不能事後母旣仕不歸省及贄當政乃奏其狀詔賜孝經罷歸田里

舊唐書李嗣真傳嗣真撰孝經指要一卷

蘇世長傳周武帝時世長年十餘歲上書言事武帝以其年少召問讀何書對曰讀孝經論語武帝曰孝經論語何所言對曰孝經云爲政者不敢侮於鰥寡論語曰爲政以德武帝善其對令於獸門

館讀書

按新唐書云帝曰善使卒學虎門館

王元感傳元感雖年老猶能燭下看書通宵不寐長安三年表上其所撰尙書糾繆十卷春秋振滯二十卷禮記繩愆三十卷并所注孝經史記藁草請官給紙筆寫上祕書閣詔令弘文崇賢兩館學士及成均博士詳其可否

劉子元傳少與兄知柔俱以詞學知名自幼及長述作不倦論孝經非鄭元註

尹知章傳少勤學嘗夢神人以大鑿開其心以藥內之自是日益開朗盡通諸經精義後祕書監馬懷素奏引知章就祕書省與學者刊定經史所著孝經諸書行於時

龍城錄國初有孝子王漸作孝經義成五十卷事亦該備而漸性鄙朴凡鄉里有鬭訟漸卽詣門高聲誦義一卷反爲漸謝後有病者卽請漸來誦書尋亦得愈其名藹然余時過汴州適會路逢一老人亦談此事頗亦敬其誠也

集賢注記壽王通孝經賜王迴質束帛酒饌衣被

五代史南平世家高從誨廣順元年封南平王漢遣國子祭酒田敏使於楚假道荆南敏以印本五經遺從誨從誨謝曰予之所識不過孝經十八章爾敏曰至德要道於此足矣敏因誦諸侯章曰在上不驕高而不危制節謹度滿而不溢從誨以爲譏己卽以大卮罰敏

宋史馬仁瑀傳仁瑀十餘歲時其父令就學輒逃歸又遣於鄉校習孝經旬餘不識一字

袁逢吉傳逢吉四歲能誦爾雅孝經

王嗣宗傳嗣宗嘗著遺戒以示子孫令以孝經弓劍筆硯置墻中

馮元傳元執親喪皆案禮變服不爲世俗齋薦遇祭日與門生對坐誦孝經而已

范正平傳正平學行甚高雖庸言必援孝經論語

楊存中傳存中請詣太學謁先聖帝曰學校旣興武人亦知崇尚如漢羽林士皆通孝經況其他乎
胡舜陟傳舜陟遷侍御史奏向者晁說之乞皇太子講孝經論語間日讀爾雅而廢孟子願詔東京
遵舊制先讀論語次讀孟子

袁甫傳甫字廣微歷兼吏部尙書有孝經說孟子解

王居安傳居安字資道黃巖人始能言讀孝經有從旁指曰曉此乎卽答曰夫子教人孝耳

趙景緯傳景緯知台州以化民成俗爲先務取孝經庶人章爲四言咏贊其義使朝夕歌之至有爲
之感泣者作訓孝文以勵其俗

馮去非傳去非字可遷南康都昌人父椅家居授徒注孝經章句

道學傳朱熹幼穎悟就傳授孝經一闕題其上曰不若是非人也所著有孝經刊誤